

# Bengkel Perladangan Karas

Jumaat, 17 Mei 2013 10:40



**- MALAY VERSION ONLY -**

TEKS UCAPTAMA KETUA PENGARAH MTIB SEMPENA  
BENGKEL PERLADANGAN KARAS  
DI DEWAN PERSIDANGAN MTIB,  
TINGKAT 13, MENARA PGRM CHERAS  
14 - 15 MEI 2013

Bismillahir Rahmannir Rahim

Assalamualaikum w.b.t. dan Salam 1 Malaysia,

Yang dihormati Pengarah-Pengarah Bahagian MTIB, para jemputan, peserta-peserta seminar, tuan-tuan dan puan-puan sekalian.

Alhamdulillah, bersyukur ke hadrat Allah SWT atas izin dan rahmatNya kita semua dapat berkumpul pada hari ini. Terlebih dahulu, saya ingin mengambil kesempatan ini mengucapkan terima kasih kepada pihak penganjur kerana menjemput saya untuk menghadiri dan merasmikan Bengkel ini yang merupakan bengkel pengkhususan pertama yang dianjurkan oleh MTIB pada tahun 2013 ini melibatkan tajuk Perladangan Karas. Sebagai tambahan, bengkel ini bukanlah bengkel pertama kali dianjurkan oleh MTIB, malah merupakan hampir 50 siri bengkel dan seminar semenjak tahun 2006 lagi.

Tuan-tuan dan puan-puan,

Lembaga Perindustrian Kayu Malaysia (MTIB) adalah merupakan Pihak Berkuasa Pengurusan atau Management Authority (M.A.) bagi Convention on International Trade of Endangered Species of Wild Flora and Fauna (CITES) untuk Semenanjung Malaysia dan Sabah, manakala Jabatan Perhutanan Sarawak pula adalah M.A. bagi negeri Sarawak. Pihak Berkuasa yang telah dilantik ini bertanggungjawab memastikan perdagangan eksport, import dan eksport semula spesies flora dan fauna yang tersenarai di dalam Apendiks CITES mematuhi semua peraturan CITES dan ini termasuklah spesimen atau barangan kayu Karas dan gaharu. Oleh itu, bagi semua urusan pendaftaran ladang dan perdagangan antarabangsa bagi keluaran Karas dan gaharu perlu dikemukakan kepada MTIB bagi Semenanjung Malaysia dan Sabah, atau kepada Jabatan Perhutanan Sarawak bagi pemohon di Sarawak. Ini adalah kerana pokok Karas dan gaharu merupakan spesies yang termaktub dalam Apendiks II, Konvensyen CITES.

Di samping itu, Akta Perdagangan Antarabangsa mengenai Spesies Terancam 2008 (Akta 686) telah dikuatkuasakan pada Julai 2010 juga menyenaraikan Karas dalam Jadual Ketiga bagi spesies kayu yang mana semua pengusaha, pemilik ladang, penanam dan individu yang menghasilkan tumbuhan dibiakkan secara buatan (artificially propagated) bagi maksud perdagangan komersial perlu mendaftar dengan MTIB dan Jabatan Hutan Sarawak.

Para hadirin yang dihormati sekalian,

Industri Karas dan gaharu di negara ini bukanlah industri yang baru pada kita semua. Semenjak dahulu lagi, gaharu telah menjadi kegunaan seharian. Saya turut difahamkan bahawa industri Karas dan gaharu di negara ini mula meningkat populariti dengan mendadak bermula tahun 2005. Setahun demi setahun, industri ini

berkembang pesat dengan pertambahan peladang-peladang Karas di Malaysia. Berdasarkan statistik eksport Malaysia 2012, nilai eksport bagi produk Karas dan gaharu mencatat RM 10.04 juta. Daripada jumlah ini, RM 9.8 juta adalah daripada produk gaharu berupa woodchips/woodblock dan nilai minyak gaharu pula adalah sebanyak RM150 ribu.

Eksport produk Karas/Gaharu pada tahun 2012 berjumlah 199,999 kilogram, yang menunjukkan peningkatan sebanyak 4.8 peratus berbanding tahun 2011 dengan jumlah 190,757 kilogram. Daripada jumlah ini, sebanyak 174,049 kilogram produk kayu Karas/gaharu atau 87 peratus adalah terdiri daripada woodchips/woodblock yang telah dieksport ke pasaran utama seperti Taiwan (71,370 kilogram), Vietnam (41,758 kilogram) dan Singapura (23,716 kilogram). Manakala 129.75 liter minyak gaharu pula telah dieksport ke destinasi pasaran utamanya iaitu UAE (74.5 liter), Singapura (24 liter) dan Bahrain (20 liter).

Penurunan dalam nilai eksport jika dibandingkan RM 11.14 juta (2011) dan RM 10.04 juta (2012) ini adalah disebabkan oleh kekurangan gaharu berkualiti daripada sumber hutan asli. Oleh itu, adalah amat wajar dan bertepatan bagi industri ini untuk mendapatkan bekalan gaharu yang berterusan daripada sektor perladangan Karas. Permintaan pasaran yang masih tinggi dapat dilihat melalui trend penjualan gaharu yang telah berubah dari negara Timur Tengah dan kini menjangkau ke negara Asia Timur seperti Taiwan, Jepun dan China.

Para hadirin yang dihormati sekalian,

Minat masyarakat Malaysia dalam perladangan Karas dan pengeluaran gaharu didapati meningkat sejak kebelakangan ini. Saya telah dimaklumkan bahawa MTIB menerima pertanyaan setiap minggu daripada orang ramai berkaitan potensi industri ini dan bantuan yang boleh disediakan oleh kerajaan. Kursus atau seminar mengenai potensi gaharu bukan sahaja dianjurkan oleh agensi kerajaan yang terlibat dalam sektor ini, bahkan pihak swasta dan pengusaha perladangan karas dan pengeluar gaharu turut mempromosi aktiviti ini. Sehubungan itu, saya berpandangan bahawa bengkel anjuran MTIB hari ini adalah sangat bertepatan untuk menghimpun semua pihak terbabit sama ada daripada sektor awam mahupun pihak swasta untuk kita sama-sama berbincang dan merangka strategi pembangunan industri perladangan Karas dan pengeluaran gaharu. Ini akan menjadikan industri ini lebih terancang dan terpandu kepada satu polisi dan hala tuju yang jelas sekaligus berkemampuan untuk dilaksanakan dengan jayanya.

Sebagai pengakhir kata, adalah menjadi harapan saya agar Bengkel Perladangan Karas ini dapat memberikan manfaat dan faedah yang berterusan kepada peladang Karas yang baru mahupun yang telah lama berkecimpung dan menjadi platform untuk bertukar-tukar fikiran ke arah memajukan lagi prestasi industri ini sehingga mampu menjadi sumber pertumbuhan baru bagi industri perkayuan negara, seiring dengan era bioteknologi dan inovasi pada hari ini. Semoga semua pandangan dan maklum balas yang diperolehi dalam bengkel ini dapat digarap untuk dijadikan garis panduan ke arah kelestarian industri perladangan Karas dan gaharu di Malaysia.

Dengan kalimah suci, Bismillahhirrahmanirahim, saya dengan sukacitanya merasmikan bengkel Perladangan Karas dan Gaharu pada hari ini.

Sekian, wabillahaufikwalhidayah Assalamualaikum warahmatullahi wabarakatuh.

DR JALALUDDIN HARUN  
KETUA PENGARAH MTIB  
14 MEI 2013